

Judicium hoc ferri cōdēntis dicebatur. Huic simile erat judicium vomerum ignitorum, per quos gravi criminis suspicione laborans nudis pedibus transire debebat. In vita S. Henrici apud Surium c. 21. 14. *Julii* scriptum est, *hoc sibi judicium elegisse sanctissimam sc̄eniam Cunegundem Henrici Imperatoris uxorem; quamquam illud servorum proprium fuisse demonstraret Concilium Mōguntinum an. 847. can. 24. apud Labbæum t. 9. Conc. col. 1045. ed. Ven.* Erat & judicium ignis, per quem transire debebat quisquis rei alicujus veritatem demonstrare cupiebat. Celebre illud, quod de Petro Monacho Vallis Umbrosæ, qui *Ignens* appellatus, atque Albini Episcopus, & Cardinalis fuit, memoria proditum est. Is ut ostenderet Florentinum Episcopum simoniace in eam sedem irrepsisse per medios ignes transitivit, sicuti narrant Baronius ad an. 1063. n. 53. t. 17. p. 249. ed. Lucae, & Ughellius *Ital. sacr. in Episc. Alban.* n. 26. t. 1. col. 251. ed. Ven. an. 1717.

(5) De Monomachia, seu duello late agit Muratorius *Antiq. Italic. Dissert. 39.* Erat & judicium crucis, ac panis & casei, quæ duo similiter ad vulgares probationes referuntur. Crucis judicium plures memorant Capitularia Regum Francorum. Du-Cangius in *Gloss. ir. verb. Crucis judicium multis querit*, quænam esset hujus judicij ratio, ac denique sic statuit, eos, qui hoc judicium subibant, expansionis in crucis formam brachiis, ad crucem stare debuisse certo, ac definito tempore, ex. gr. donec Evangelium, aut aliqui psalmi recitarentur, qui si immobiles permanerent, inacui, si vero caderent, aut crimen fateri ultra cogerentur, rei-judicabantur. Judicium panis, & casei in eo consistebat, quod alicui panis, & caseum benedictum dabatur, ac si is utrumque ederet, atque in stomachum mitteret innocens, contra vero reus habebatur.

(6) *Can. 20. c. 2. qu. 5., c. 8. de Purgat. canon.*

§. XXXI. Præsumptio probabilis oritur ex probabilitibus conjecturis, quæ prudentibus etiam viris persuaderi possunt; violenta ex indiciis, argumentisque gravissimis, quæ fere claram probationem constituunt. Cunctæ hominis præsumptiones pendent ab arbitrio judicis, cuius est pro animi sui religione judicare, quanta in singulis vis insit, & quanta iis fides tribuenda videatur. Coacervantur autem præsumptiones, & conjecturæ, quæque singulæ forte inter se non movent, universæ tamen connexæ, atque conjunctæ movere debent. Plus præstant præsumptiones in causis civilibus, quam in criminalibus, in quibus nemo ex solis conjecturis etiam vehementibus, condemnandus est (1); excepto

crimine hæreseos, cuius suspectus tamquam hæreticus condemnatur, nisi omnem suspicionem excusserit (2).

(1) *Cap. 14. de Præsump.*

(2) *Cap. 13. §. Qui autem de Hæret., c. 7. 8. eod. in 6.*

T T U L U S X.

De exceptionibus & replicationibus.

- I. Exceptiones peremptorix, vel dilatoria.
- II. Peremptorix litis finitæ.
- III. Simpliciter peremptorix.
- IV. Peremptorix exceptiones quando proponendæ?
- V. Dilatariarum exceptionum divisio.
- VI. Dies feriati.
- VII. Exceptiones contra actorem.
- VIII. Exceptiones contra judicem.
- IX. Dilatoria exceptiones quando proponendæ?
- X. Exceptio majoris excommunicationis.
- XI. Effectus exceptionis.
- XII. Replicationes, duplicaciones, triplications.

§. I.

¶. Habet & reus arma sua, quibus in judicio adversus actorem utitur, eaque sunt exceptiones. Exceptio est actionis, vel intentionis exclusio. Ea si omnino perimit, ac tollit actionem, perpetua, & peremptoria si tantum ad tempus agenti obstat, & causam ad aliud tempus, aut alium judicem, vel locum transfert, temporalis, & dilatoria appellatur.

§. II. Ex peremptoriis exceptionibus quædam sunt, quæ majorem vim habent, & ideo peremptorix litis finitæ dicuntur, ceteræ simpliciter peremptorix appellantur. Primi generis sunt exceptiones jurisjurandi, rei judicatae, transactionis. Hæ litem jam compositam, atque è medio sublatam ostendunt, & exordium ipsum impediunt litis, vetantque, ne frustra novum judicium instituatur (1). Sed ut locum habeant hujusmodi exceptiones, necesse est, quod lis pridem extincta, vel jurejuringando, vel transactione, vel re judicata denuo inter easdem personas, de eadem re, atque ex eadem petendi causa instituatur (2).

Tom. III.

O

(1) *Cap. I. de Lit. contest. in 6.*

(2) *L. 3. 12. 21. 23. 41. ff. de Except. rei judic.*

§. III. Exceptionum, quas *simpliciter peremptorias* dicimus, longe major est numerus, cum nulla fere sit actio, quæ contraria exceptione submoveri, aut tolli aliquando non possit. Ad hoc genus referuntur exceptiones præscriptionis, doli mali, metus, & ceteræ, quorum non exiguis est numerus, quæque suis locis in utroque Jure singillatim explicantur. Hæc non impediunt quidem ingressum litis, sed tamen perimunt, & eventunt actionem institutam.

§. IV. Peremptoriæ exceptiones non modo ante litem contestatam, sed etiam postea in qualibet judicii parte ante rem judicatam (1), quin etiam interdum post rem judicatam in actione judicati, recte opponuntur (2). Par est ratio exceptionum, quæ impediunt exitum sententiae, ut si post eam actor acceperit, quod petebat, recte reus exceptionem proponit, per quam abs latæ sententiæ executionem avertit.

(1) *L. 4. & 8. cod. de Except., l. 2. cod. senten. rescind. non poss.*

(2) *L. 11. ff. ad S. C. Macedon., l. 1. §. 18., l. 20. §. ult. ff. de Re judic. Confer Cujacum in c. 29. de Test. opp. t. 6. col. 846.*

§. V. Dilatoriæ exceptiones aut ipsam respiciunt causam, aut actorem, aut judicem. Prioris generis sunt exceptiones illæ, quæ proponuntur contra libellum, quod sit vel ineptus, vel obscurus, quod non cesserit solutionis dies, quod feriarum tempore sit emissa citatio.

§. VI. Feriati dies sunt illi, quibus lege agere non licet, & omnis judicialis strepitus conquiescit (1). Feriarum quædam civiles, quædam ecclesiasticæ dicuntur; hoc est quædam hominum, quædam religionis causa institutæ sunt. Illæ variæ sunt pro more, & legibus populorum, præcipue tamen pertinent ad commoda messium, & vindemiarum (2), hæc sunt *dies devotionum*, & *orationum* (3), seu festi dies, quibus religioni operam

dare oportet, & quibus communes dies opponuntur (4). Jure civili judiciales actus feriatis diebus exerceri non possunt (5), nisi litigantes sua sponte ad judicem veniant (6); sed jure canonico, ne ipsis quidem litigantibus consentientibus, eosdem actus festis diebus expedire licet (7).

(1) Eleganter Ovidius *Fast. I. 1. vers. 73. opp. t. 3. p. 15. ed. Amstelædami 1702.* hos dies expressit his versibus

*Lite vacent aures, insanaque protinus absint
Jurgia, differ opus, livida lingua, tuum.*

Ideo à clericis dies omnes hebdomadæ feriæ dicuntur, quia clerci nullo die à divinis vacare debent; atque etiam Flaminibus omnes dies feriati erant apud A. Gellium Noct. Attic. I. 10. c. 15. p. 531. ed. Lugdun. Batav. 1666., quod recte observavit Baronius ad an. 44. n. 88. t. 1. p. 316. ed. Luca. Atque hoc feriæ nomen primum hebdomadæ Paschalis diebus datum fuisse, animadverrit Cironius in *Paratitl. decretal. de Feriis* n. 5. p. 147. ed. Vindobon. 1761.; quibus diebus omnes Christiani sese ab opere servili abstineret, & sacrosancta mysteria percipere debebant Concilium Matisconense II. can. 2. apud Labbæum t. 6. col. 674. Paschale hoc tempus feriatum fecisse Constantiū M., tradit Alexander Monachus de *Invent. S. Crucis* apud Cironium I. c. n. 6.; & exemplo harum feriarum, reliqui etiam dies dicti sunt feriæ, distinctione tamen habita inter ferias simplices, & solemnes c. ult. de *Feriis*. Sane lex Constantini memoratur apud Josephum Scaligerum de *Emend. tempor.* p. 776. ed. Genevæ 1629., in qua duæ hebdomadæ paschales, quarum altera Pascha antecedit, altera sequitur, ab opere faciendo excipiuntur. Nam majores nostri Pasehali solemnitatibus integrōs dabant dies quindecim, hoc est hebdomadam, quæ Pascha antecedebat, & hebdomadam, quæ sequebatur; illa πάσχα σατρωτούς pascha crucis, hæc vero πάσχα τετραπορίου pascha resurrectionis vocabatur. Utriusque generis exempla colligit Joannes Gaspar Sickerus *Thesaur. ecclæs.* t. 1. p. 304. & t. 2. p. 1014. ed. Amstelædam. 1682. Generale nomen *Pascha*, quod est ex Hebræo phase, quod transitum significat, utrumque comprehendit. Nam Pascha Christianorum tum passionem, tum resurrectionem includit Christi Servatoris, qui est vere agnus paschalis, qui pro nostrum salute sese præbuit hostiam ad sacrificium. De his quindecim diebus Paschalibus lex est Valentini, Theodosii, Arcadii I. 2. cod. Theod. de *Feriis*, in qua habentur hæc: *Santos quoque Pasche dies*, qui septeno vel præcedunt numero, vel sequuntur, in eadem observatione numeramus. Consule Gothofredum in *eamd. I. 2. t. 1. cod. Theod.* p. 142.

ed. Lipsiae 1736., ubi multa habes antiqua testimonia, ex quibus constat, qua reverentia maiores nostri quindecim hos paschales dies, quos rebus dabant Religionis, prosequerentur. Memorant etiam quindecim hos dies, tamquam ubique feriatos, Papianus *Respons. tit.* 12. apud Schultingium *Jurispr. vet. ante-justin.* p. 835. ed. cit., S. Augustinus *Serm. 259. in die domin. oct. Pasch. l. 6. col. 1064.* t. 5. part. 1. ed. Ven. 1731. S. Joannes Chrysostomus, S. Epiphanius, ceteri, quos laudat Gothofredus *l. c.*

(2) Harum feriarum mentio est apud Statuum *Silv. l. 4. vers. 39. seq. p. 198. ed. Lugd. Batav. 1671.*

*Certe jam Latiae non miscent jurgia leges,
Et pacem piger annus habet, messesque reversæ
Dimisere forum.*

A. Gellium *NoEt. Attic. l. 9. c. 15. p. 496. ed. Lugdun. Batav. 1666.*, Plinius *l. 8. Ep. 21. p. 212. ed. Oxonii 1703.*, Ulpianum *l. 1. 2. 3. ff. de Feriis*, S. Augustinum *Confess. l. 9. c. 2. opp. t. 1. col. 157. ed. Ven. cit., in can. 2. c. 15. qu. 4.*, in *l. 2. et 7. cod. de Feriis*. In *l. 2. cod. Theod. de Feriis* omnes dies juridici esse jubentur, exceptis duobus mensibus messium, & vindemiarum, Kalendis Januariis, natibus urbium maximarum Romæ, & Constantinopolis, natibus Imperatorum, quibus & editi in lucem, & imperium auspicati erant, quindecim diebus Paschalibus, qui & ecclesiastica, & civili lege feriati erant, & omnibus diebus Solis per integrum annum. Multa de feriis tum civilibus, tum ecclesiasticis habent Binghamus *Antiquit. eccles. l. 20. c. 1. & seq. 1. 9. p. 1. & seq. ed. Halæ Magdeburg. 1760.*, Gothofredus in *cit. l. 2. cod. Theod. de Feriis t. 1. p. 140. seq.*, & Selvagius *Antiq. Christian. l. 2. c. 4. §. 2.*

(3) Ita hi dies appellantur in *l. ult. cod. Theod. de Navicul.*

(4) *L. 2. cod. de Stat. & imagin.* De feriatis diebus agit Gregorius IX. in *c. ult. de Feriis.*

(5) *L. 2. cod. de Feriis.*

(6) *L. 8. cod. eod.*

(7) *Cap. ult. de Feriis.* Sed obstare videtur *c. 6. de Dol. & contumac.*, ubi habentur hæc: "Ipsi mandavimus, ut usque ad Dominicam . . . per se, vel procuratorem . . . ad præsentiam nostram, accederet; itemque cap. 15. de Accusat., ubi scriptum est: Episcopum ad festum Dominicæ peremptorie nos meminimus citavisse. " Has Decretales quidam ita explicant ajentes, usque ad, & ad idem sæpe esse quod *infra*, ut in *c. 9. de Fid. instram.* Sed aliud ex *cit. c. 6.* non obscure deprehenditur, ut proinde alia eorum Decretalium sententia sit. Scilicet utroque loco reus citatus fuerat jussu Summi Pontificis, qui derogaverat legi, quæ festis diebus

judicia exerceri vetabat. Ceterum disertissime Gregorius IX. in *cit. c. ult. de Feriis* debere inquit *judiciale strepitum diebus conquiescere feriatis*; idemque jam erat ante Gregorium jure canonico constitutum. Nam Concilio Compendiensi, quod descriptum est in *c. 1. de Feriis, in eis*, inquit de Dominicis diebus, *mercatum minime fiat, neque placitum*, hoc est *judicium*, quo sensu illud vocabulum sæpe usurpatur in Capitularibus Regum Francorum, in legibus Ripuariorum, Longobardorum, aliarumque gentium, unde ortum est verbum *placitare*, nimisrum judicio contendere. Idem habet Concilium Triburiense an. 895. can. 35. t. 11. *Concil. col. 647.*, & Aquisgranense II. can. 18. t. 9. col. 840. collect. Labbae ed. Ven. cit. Quod autem addit Gregorius, judiciales actus festis diebus gestos plane irritos esse, id forte ante ipsum nullo canone expresse statutum fuerat; quamquam id esset nominatum sancitum à Jure civili in *l. 1. ff. de Feriis*, & in *l. 2. cod. eod.* Sed quoad dies festos Gregorius Jus civile emendavit, quoniam, ne cum consensu quidem litigatorum, iis diebus judiciales actus fieri permisit.

§. VII. Ad actorem pertinent exceptiones, quibus reus utitur contra personam actoris, aut procuratoris, ut si opponat, alterutrum, vel utrumque esse communicatum, proscriptum, pupillum, aut alio juris, vel naturæ impedimento in judicio stare prohibitum, procuratorem mandato carere, aut non recte esse constitutum.

§. VIII. Postremo exceptiones contra judicem duobus ex fontibus hauriuntur, aut quia non est competens, sive legitimus, aut quia suspectus est. Judex non competens, sive non legitimus ille dicitur, qui vel extra territorium suum jus dicit, vel inter homines sibi non subjectos, vel suæ jurisdictionis modum excedit (1). Suspectus autem judex est, quia cognatus, affinis, conjunctus actori, quia cum reo graves inimicitias gerit, quia juris imperitus, quia eidem causa patronus fuit, quia similem ipse in alio judicio litem habet (2).

(1) Confer titulum Codicis *Si non à competen. judic.*

(2) *Cap. 36. de Appellat.* Vide etiam Capitularia Caroli M. l. 7. c. 240. col. 718. t. 1. ed. Baluzii Ven. 1772.

§. IX. Omnes dilatoriæ exceptiones inter exordia litis (1), hoc est ante litem contestatam opponendæ sunt (2); nisi postea suboriantur, vel postea innotes-

cant (3). Quin etiam ne **dolo**, & malitia rei judicium in longum trahatur, certus à judice dandus est dies dilatatoriis exceptionibus opponendis; quo elapso illæ tantum proponi possunt, quas **nova** obtulit causa quasque reus tunc sibi primum fuisse **cognitas** juratus affirmaverit (4), itemque illæ, quæ **irritum**, & inane judicium faciunt (5). Sed præsertim initio litis, atque ante ceteras dilatorias exceptiones opponi debet præscriptio fori, ne quis, ea omissa, si ad aliquem **actum** in judicio pergit, in judicem consensisse videatur (6): nisi justa recusandi judicis causa deinceps **exoriatur** (7). Excipitur clericus, qui, uti demonstratum **supra** est, jurisdictionem laici judicis prorogare non potest.

(1) Sic Julianus Imperator in l. 12. cod. de Except.

(2) Hæc quidem Canonici, & Civilis Juris regula est in l. 4. de Jurisd. omn. jud., et in cit. l. 12., et c. 20. de Senten. et re judic.

(3) Cap. 4. de Except.

(4) Cap. 4. cit. c. 6. Qui **matrim.** accus. pos.

(5) Huc spectat exceptio falsi Procuratoris, seu mandato carentis, quæ "non solum ante sententiam, verum etiam postea potest ob-, jici, utpote qua probata judicium nullum, & nullius momenti con-, troversia reputantur," ut inquit Pontifex in c. 4. de Procurat. Eadem ratio est exceptionis revocati procuratoris, cum mandatum ex- piret, posteaquam revocatum est c. 3. eod.

(6) L. 1. et 2. ff. de judic.

(7) Cap. 21. et 25. de Offic. judic. delegat.

§. X. Sola exceptio majoris excommunicationis in qualibet parte litis opponi potest, etiamsi reus eam præfinito tempore omiserit; quod jure singulari cautum est, ne quisquam in periculum **anima** suæ excommunicato com- municare cogatur (1). Tantum post appellationem proposita hæc exceptio judicii cursum non impedit (2); sed antea judex ipse ex officio debet publice excommunicatum à judicio reppellere, quamquam nemo hujusmodi exceptionem objicerit (3). Quoniam vero litigatores excep- tione excommunicationis ad vexanos adversarios abutebantur, sapientissime ab Innocentio IV. certus est constitutus ejus opponendæ modus (4). Scilicet reus, qui illa contra actorem exceptione utitur, exprimere

speciem excommunicationis nomenque excommunicato- ris debet; illamque demonstrare intra dies octo; securus progrediendum judici in causa est, ac reus in expensas condemnandus. Quod si iterum hæc exceptio objiciatur, atque probetur, actor à judicio repellitur, sed valent ea quæ gesta sunt; post duas vero vices non amplius ea- dem exceptio, nisi ob justam causam, proponi potest.

(1) Cap. 12. de Except.

(2) Cap. 11. de Except.

(3) Cap. 12. cit., & c. 1. eod. in 6.

(4) Cap. 1. de Except. in 6.

§. XI. Duo potissimum parit exceptio primum, quod ea recte probata actionem excludit, sive ad tempus, si- ve perpetuo, prout exceptio dilatoria, aut peremptoria est (1); alterum, quod reus exceptione actor efficitur (2). Propterea quemadmodum ad actorem probandi onus pertinet, ita & reus probare debet exceptionem suam (3); quod si ipse non præstet, tamen actor non liberatur ab onere probandi, quoniam reus, qui excipit, actoris in- tentionem non censemur confiteri (4).

(1) L. 2. ff. de Except.

(2) L. 1. ff. eod.

(3) L. 19. & 25. ff. de Probat.

(4) L. 9. ff. de Except.

§. XII. Adversus exceptiones comparatae sunt repli- cationes, quæ sunt adjumenta, & præsidia, quibus ac- tor utitur adversus reum, ut exceptionem tollat (1). Nam replicatio est exceptionis exclusio (2), quæ tamet- si à parte actoris veniat, tamen est potius exceptio, quam actio; quia opponitur excipienti **re**o, qui in ex- ceptione actor est (3). Quemadmodum vero rei excep- tionem reinovet actoris replicatio, ita hanc excludit du- plicatio rei, atque hanc rursus actoris triplicatio; & sic deinceps multiplicantur nomina, dum aut **reus**, aut **actor** objicit (4). Non enim jure civili definitus est mo- dus defensionum, quæ ab actore, & à reo proponuntur. Sed in foro ecclesiastico hæ duplicationes, triplicatio-

nesque non obtinent; verum *judex ex officio iis modum constituit, & causam definit.*

- (1) *L. 3. cod. de Except.*
- (2) *L. 2. §. 1. ff. de Except.*
- (3) *L. 1. ff. eod.*

(4) *L. 2. §. 3. de Except.* Quo loco Ulpianus replicationi non *duplicacionem*, ut Tribonianus §. 1. *Instit. de Replicat.*, sed *triplicationem* opponit. In eadem cum Ulpiano causa est Julianus in *l. 7. §. Curator ff. de curat. furios.* Ne à duobus his Jurisconsultis Tribonianus dissentiat, sunt qui ex ejus auctoritate utrumque illum Ulpiani, & Juliani locum emendandum putant; sed id quidem est contra omnium veterum exemplarium fidem. Meo judicio, nihil est, quod ea de re multo sermone laboremus. Quæ Triboniano est *duplicatio*, eam antiqui Jurisconsulti *replicationem* appellavunt, & certe *replicare* est rursus plicare, idemque prorsus ac *duplicare*. Merito igitur *replicationem triplicatio* excipere debebat.

TITULUS XI.

De ordine cognitionum.

- | | |
|---|--|
| I. Quales exceptiones certo ordine cognoscendæ? | bus in rebus committatur? |
| II. Quesiones præjudiciales. | VIII. Spolium actionis, & exceptionis loco proponitur. |
| III. Causæ incidentes. | IX. Spoliatus ante omnia restituendus. |
| IV. & V. Causæ præparatoriæ, earumque species. | X. & XI. Quando spoliatus non restitutur? |
| VI. Spolium quid? | |
| VII. Quemadmodum, & qui- | |

§. I.

Exceptiones, quæ à reo proponuntur, plures sæpe causas, & quæstiones inducunt, quæ certo ordine à legibus definito tractandæ sunt, qui *ordo cognitionum* appellatur (1). Causæ autem hujusmodi sunt vel *præjudiciales*, in quibus ab unius decisione alterius decisio pendet, vel *incidentes*, quæ nimirum incident in ipsa lite, cuius gratia judicium exercetur; vel *præparatoriæ*, quarum decisio alterius decisionem faciliorem reddit; vel quæ quidem *ex eodem negotio* oriuntur, sed tamen *ad diversa* tendunt, neque à se invicem pendent.

(1) Cognitionis nomen proprio ad principem, vel ad magistratus refertur, cum princeps sua sponte cognoscit, vel magistratus ex suo officio cognitionem committit: vel etiam ipsi Magistratus ex suo officio cognoscunt, quæ cognitione legitima, & extraordinaria appellatur; ut patet ex titulo *ff. de Extraord. cognit.* Hinc illud Svetonii in *Claud. c. 15. p. 450. ed. Traject. ad Rhen. 1691.* "Alium interpellatum ab adversario de propria lite, negantemque cognitionis rem, sed ordinarii juris esse, agere causam confessim apud se coegit;" ita intelligendum est, negantem ad principis cognitionem rem pertinere, atque ajentem, ipsum non cognoscere, sed judicem dare debuisse, apud se causam agere coegit. Scilicet cum ordine, & jure in jurisdictione recepto *Prætorii* liceret judicem dare, quod est jurisdictionis *l. 3. ff. de Jurisd.*, ac dare etiam pro potestate solitus esset, extraordinariam esse oportuit cognitionem, quam ipse cogente officio suscipiebat, & quam alteri committere non poterat. Atque hoc equidem referendum arbitror quod de Nerone narrat Tacitus *Annal. l. 13. c. 51. t. 1. p. 890. ed. Amstelod. 1673.*, quem ait edixisse, "ut Romæ *Prætor*, per provincias qui pro *Prætore*, aut *Consule* essent, jura, adversus Publicanos extra ordinem redderent. Alii extraordinarias cognitiones vocant, de quibus nulla ordinaria, certoque jure actio erat constituta, quæque à *Prætore* extra ordinem, & ex æquitate suscipiebantur, easque opponunt ordinariis cognitionibus, quæ ordinariam habebant actionem, certoque jure nitebantur. Contra aliis ordinaria cognitione est, quæ judicibus datis competit. Consule Donellum *de jur. civil. l. 8. c. 2. n. 4. opp. t. 2. col. 693.*, & *l. 17. c. 22. n. 9. & 10. t. 4. col. 1351. & seq. ed. Lucæ*, & Scipionem Gentilem *de jurisd. l. 2. c. 20. opp. t. 3. p. 187. et seq. ed. Neap. 1764.* Verum facultas judicandi, sive ordinaria, sive extraordinaria, vulgo cognitione dicitur *L. penult. ff. de jurisd. omn. jud.* Quare titulus hic, qui in Gregorianis Decretalibus est *de ordine cognitionum*, in prima compilatione inscribitur *de Ordine judiciorum*, quasi idem *judicium*, et *cognitione* sit, ut in *cap. 1. et penult. de ordine cognit.* *Cognitionales sententias memorat l. un. cod. de Senten. Præf. præt.*, et *l. 13. cod. de Sent. et interloq.*, quæ scilicet causa cognita feruntur; & in *l. ult. §. Illud etiam cod. de Temp. et reparat.* occurrit verbum *cognitionaliter*, quo significatur id, quod parte utraque præsente, & adhibita causæ cognitione gestum est.

§. II. *Præjudiciales quæstiones noscendæ*, definendæ sunt, antequam causa altera, quæ ex illis pendet, cognoscatur. Ita si qua mulier affirmet, se cum certo homine iniisse matrimonium, isque excipiat, illud consistere non potuisse propter impedimentum cognitionis, antea hæc exceptio cognoscenda est; quoniam ea cognita, ac definita matrimonii quæstio dirimitur (1).